

四庫全書

集部

欽定四庫全書

集部
陸士龍集卷二

詳校官監察御史_臣曹錫寶

檢討_臣何思鈞覆勘

覆校官編修_臣莊通敏

校對官中書_臣李荃

謄錄監生_臣王焜

欽定四庫全書

集部二

陸士龍集

別集類一晉

提要

臣等謹案陸士龍集十卷晉陸雲撰雲與兄
機齊名時稱二陸史謂其文章不及機而持
論過之今觀集中諸啟其執辭諫諍陳義鯁
切誠近於古之遺直至其文藻麗密詞旨深
雅與機亦宜上下平吳二俊要亦未易優劣

也隋書經籍志載雲集十二卷又稱梁十卷
錄一卷是當時所傳之本已有異同新唐書
藝文志但作十卷則所謂十二卷者已不復
見至南宋時十卷之本又漸湮沒慶元間信
安徐氏瞻始得之於秘書省與機集並刊以
行然今亦未見宋刻世所行者惟此本考史
稱雲所著文詞凡三百四十九篇此僅錄二
百餘篇似非足本蓋宋以前相傳舊集久已

亡佚此特裒合散亡重加編輯故叙次頗叢
雜如答兄平原詩二首其行矣怨路長一首
乃機贈雲之作故馮惟訥詩紀收入機詩內
而此本誤作雲答機詩又綠房含青實四語
及逍遙近南畔二語皆自藝文類聚芙蓉部
嘯部摘出佚其全篇故詩紀以為失題系之
卷末但注見藝文某部此乃直標曰嘯殆明
人不學者所編又出詩紀之後矣特是雲之

原集既不可見惟藉此以傳什一故悉仍其
舊錄之始以存其梗概焉乾隆四十二年十
月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

集部二

陸士龍集目錄

別集類一晉

卷一

賦
歲附

卷二

詩

卷三

詩

卷四

詩

卷五

誄

卷六

頌

卷七

騷

卷八

書

卷九

啟

卷十

書答

欽定四庫全書

陸士龍集卷一

晉 陸雲 撰

賦箴

逸民賦

并序

富與貴人之所欲也而古之逸民或輕天下細萬物而欲專一丘之歡擅一壑之美豈不以身勝於宇宙而心恬於紛華者哉故天地不易其樂萬物不干其心然後

可以妙有生之極享無疆之休也乃為賦云

世有逸民兮栖遲於一丘委天刑之外心兮淡浩然
其何求陋此世之險隘兮又安足以盤遊杖短策而遂
往兮乃枕石而漱流載營抱魄懷元服一傲物思寧妙
世自逸靜芬響於永言滅絕景於無質相荒土而卜居
度山河而考室曾丘蒼蒼穹谷重深鼓木振穎葛藟垂
陰潛魚泳沚嚶鳥來吟仍蔬圃於芝薄兮即蘭堂於芳
林靡炎颺以赴節兮揮天籟而興音假樂器於神造兮

詠幽人於鳴琴挹迴源於別沼兮殫秋菊於高岑蒙玉
泉以濯髮兮臨濬谷而投簪寂然尸居儼焉山立尊者
龍見在林鳳戢道綿野以宅心望空巖而凱入明發悟
歌有懷在昔賓濮水之清淵兮儀礪溪之一壑毒萬物
之誼譁兮聊漁釣於此澤爾乃薄言容與式宴盤桓朝
挹芳露夕玩幽蘭眇區外而放志兮眷天路而怡顏望
靈嶽之清景兮想佳人於雲端悲滄浪之濁波兮詠芳
池之清瀾鄙終南之辱節兮肆伯陽之考槃眇清霄以

寄傲兮沂凌風而頽歎玄微載晏何思何欲漂若行雲
之浮泊若窮林之木咨有得之必喪兮蓋怙寵之名辱
彼貪夫之死權兮固遺生以要祿竦戰兢而履冰兮祇
肅懷以臨谷亮據鼎之無慄兮在顛沛其必渥是故夫
形瑰者徵咎體壯者為犧雖明文而龍藻兮終俛首而
受羈立修名於禍始兮登全生於戾階資朝華之促節
兮抱千載之長懷擠考終於遠期兮顛靈根而自摧殉
有喪之假樂彼無身其孰哀美達人之玄覽兮邈藏器

於無為物有自遺道無不可萬殊有同齊物無寡並家
於國等朝于野榮在世而貴身兮神居形而忘我欽妙
古之達言兮信懷莊而悅賈曾既明於天爵兮何懼悲於
人禍陋國風之違恤同明哲於大雅亂曰乘白駒兮皎
皎遊穹谷兮藹藹尋峻路兮崢嶸臨芳水兮悠裔槃丘
園兮暇豫翳翠葉兮重蓋瞻洪崖兮清輝紛容與兮雲
際欲凌霄兮從之恨穹天兮未泰詠歡友兮清唱和爾
音兮此世

逸民箴

余昔為逸民賦大將軍掾何道彥大府之俊才也作反
逸民賦盛稱官人以美寵祿之華靡偉名位之大寶斐
然其可觀也夫名者實之賓位者物之寄窮高有必顛
之吝溢美有大惡之尤可不慎哉故為逸民箴以戒反
正焉

浩浩太素制為兩儀經始君臣朝有俊弼野有逸民各
有攸屆而後品物有倫在昔后帝齊物達觀賞不假爵

教不示勸號諡莫設而生黎淳晏降迄中古黃象可觀
而唐文有煥乃彫乃藻大樸既散樸之既散萬百熙心
形為寵放神為利淫有翹者車命彼在林是故懷玉喪
寶而被褐解襟恬亡智生與世或競匪智無鑒匪心伊
鏡芒芒禹迹鞠為塗徑惟是每懷偏彼反正正反於寵
既尸干祿相協厥居而豐其屋祿之既尸刑為爾司屋
之既豐喪家于宮故非據之災戒之在凶人皆知存之
為存而莫知得之為喪榮猶振穎墜若頽荒咎自專寵

福在循牆是故保其安者常危而忘其存者不亡無休
爾榮身寔親名無謂爾崇神期好冲戒彼覆餗冒此棟
隆慎微如顯乃保身以終自古在昔逸民有作相彼宇
宙方之委舄夫豈無不休而好是冲漠是故名利之災
至人攸恪謂予未信無寧監于桑霍天明既畏神道無
親善在求已慶由積仁無念爾本聿修厥淳執盈如虛
乃反天真逸民司正敢告官人

歲暮賦

并序

余祇役京邑載離永久永寧二年春忝寵北郡其夏又
轉大將軍右司馬於鄴都自去故鄉荏苒六年惟姑與
姊仍見背棄銜痛萬里哀思傷毒而日月逝速歲聿云
暮感萬物之既改瞻天地而傷懷乃作賦以言情焉

夫何乾行之變通兮昏明迭而載路羨飛轡之遠御兮
騰六龍於天步時赴節而漸流兮氣移數而改度揮促
節於短日兮振修策於長夜運悠忽其既周兮歲冉冉
而告暮變棘心之柔風兮滋豐草之湛露玄暉邈以峻

服兮黃裳皓而振素於是顓頊御時玄冥統官天廟既
底日月貞觀淪重陽於潛戶兮嚴積陰於司寒日回
天以滅景兮飈衝淵而無瀾堅冰涸於川底兮白雪隕
於雲端普區宇之瘁景兮頻萬物之衰顏時凜戾其可
悲兮氣蕭索而傷心淒風愴其鳴條兮落葉翻而灑林
獸藏丘而絕迹兮鳥攀木而栖音山振枯於曾嶺兮民
懷慘於重襟寒與暑其代謝兮年冉冉其將老豐顏暎
而朝榮兮玄髮粲其夕皓感芳華之志學兮悲時暮而

難考遠圖逝而辭懷兮密思集而盈抱羨厚德之溥載
兮嘉豐化之大造恨盛來之苦晏兮悲衰至之常蚤指
晞露而怵心兮衍死生於靡草蒙時來之嘉運兮遊上
京而凱入委乘輅於紫宮兮剖金虎而底邑憑台光之
發暉兮荷寵靈而來集望故疇之迥遼兮沂南風而頽
泣長歎息而永懷兮感逝物而傷悲哀年歲之攸往兮
伊行人之思歸結隆思於朝日兮綴永念於泥暉表寸
陰而貞吝兮盼盈尺其若遺嗟我行之久永兮何歸途

之芒芒遵渚兮

一作於

盼川攸逝兮江湘處孝敬於神

丘兮結祗慕於惟桑瞻山川而物存兮思六親而人亡
問仁姑而背世兮及伯姊而淪喪尋餘蹤於空宇兮想
絕景於遺堂悲山林之杳藹兮痛華構之丘荒靖深情
以遐慕兮思纏綿而懷楚涕垂頤以交頰兮哀凌心而
洞駭神尋路而窘逝兮形嘖感乎其所心悠悠其若懸
兮音既絕而復舉悲人生之有終兮何天造而罔極仰
悲谷之方中兮顧懸車而日昃百年迅於分噓兮千歲

疾於一息詠大椿之萬祀兮同蟪蛄於未識歲難停而
易逝兮情艱多而泰寡年有來而棄子兮時無算而非
我祇生心於日順兮雖呼翁其難假攝僦生於逆旅兮
欲淹留其馬可彼鑿寐之有時兮亦始卒之固然舒遠
懷於千載兮悵同感乎中山鑿通人之炯戒兮懼晏平
之達言啓貞心以自責兮覽遺籍而問道亮爽鳩之既
徂兮故營丘之有紹在吾儕之陋心兮豈取樂於東表
苟長生而自得兮將奚待而有天考大德於天地兮知

斯言之益矯

愁霖賦

并序

永寧三年夏六月鄴都大霖旬有奇日稼穡沈湮生民
愁瘁時文雅之士煥然並作同僚見命乃作賦曰

在朱明之季月兮反極陽於重陰興介丘之膚寸兮墜
崩雲而洪沈谷風扇而攸遂兮苦雨播而成淫天決滌
以懷慘兮民嘖感而愁霖於是天地發揮陰陽交烈萬
物混而同波兮玄黃浩其無質雷憑虛以振庭兮電凌

牖而輝室雷鼎沸以駭奔兮潦風驅而競疾豈南山之
暴濟兮將冥海之颯溢隱隱填填若降自天高岸渙其
無涯兮平原蕩而為淵遵渚回於凌河兮黍稷仆於中
田匱多稼於億廩兮虛夙敬於祈年外薄郊甸內荒都
城陰無晞景雷無輟聲纖波靡於前途兮微津隔於峻
庭紛雲擾而霧塞兮漫天頽而地盈於是愁音比屋歎
發屢省陽堂乏暉朗室無景望曾雲之萬仞兮想白日
之寸脛感虛無而思深兮對寂漠而言靖毒甚雨之未

晞兮悲夏日之方永瞻北辰以頽息兮仰天衢而引領
愁情沈疾明發哀吟永言有懷感物傷心結南枝之舊
思兮詠莊舄之遺音羨弁彼之歸飛兮寄予思乎江陰
渺天末以流目兮涕潺湲而沾襟何人生之倏忽痛存
亡之無期方千歲於天壤兮吾固已陋夫靈龜矧百年
之促節兮又莫登乎期頤哀戚容之易感兮悲懼顏之
難怡考傷懷於衆苦兮愁豈霖之足悲雲曇曇而疊結
兮雨淫淫而未散晞朱陽於崇朝兮悲此日之屢晏劾

豐隆於岳陽兮執赤松於神館命雲師以藏用兮繼乘
龍於河漢照濛汜之清暉兮炳扶桑之始旦考幽明於
人神兮妙萬物以達觀

喜霽賦

并序

余既作愁霖賦雨亦霽昔魏之文士又作喜霽賦聊廁
作者之末而作是賦焉

毒霖雨之掩時兮情懷憤而無懌肅有禱於人謀兮反
極陰于天律靖屏翳之洪隧兮戢太山之觸石凌風絕

而謚寧兮歸雲反而揮霍改望舒之離畢兮曜六龍於
紫閣揚天步之剡剡兮播靈輝之赫奕於是朱明自皓
凱風來南復火正之舊司兮黜后土於重陰夷中原之
多滌兮反高岸於嵩岑萎禾竦而振穎兮偃木豎而成
林嘉大田之未墜兮幸神祇之有歆爾乃俯順習坎仰
熾重離兼明暢而天地悅兮羣生悅而萬物齊魚凌淵
以增躍兮鳥望林而朝濟戢流波於桂水兮起芳塵於
沈泥朱光播於甕牖兮素景行乎中閨天監作照幽明

畢覲普厥有懽覃及四國翕萬情而咸喜兮雖無獲而
自得災未及害和斯有祥翼翼黍稷油油稻粱望有年
於自古兮晞隆周之萬箱原思悅於蓬戶兮孤竹欣於
首陽陰陽交泰萬物方道炎神送暑素靈迎秋四時逝
而代謝兮大火忽其西流年冉冉其易頽兮時靡靡而
難留嗟沈哀之愁思兮瞻日月而增憂感年華之行暮
兮思乘煙而遠遊命海若以量津兮吾欲往乎瀛洲臨
儀天之大川兮凌懷山之洪波瞻增城之峻極兮仰蓬

萊之蒐莪望王母於弱水兮詠白雲之清歌雖嘉命之
未錫兮將輕舉於流沙振仙車之鳴鸞兮吐玉衡之八
和託芝蓋之後乘兮殫瓊林之朝華修無窮以容與兮
豈萬載之足多

登臺賦

并序

永寧中參大府之佐於鄴都以時事巡行鄴宮三臺登
高有感因以言崇替迺作賦云

承后皇之嘉惠兮翼聖宰之威靈肅言詞而述業兮乃啟

行乎北京巡華室以周流兮登崇臺而上征攀凌坻而
遂躋兮迄雲閣而少寧爾乃佇眇瑤軒滿目綺寮中原
方華綠葉振翹嘉生民之亶亶兮望天晷之苕苕歷玉
階而容與兮憩蘭堂以逍遙蒙紫庭之芳塵兮駭洞房
之迴飈頽嚮逝而迂物兮傾冠舉而凌霄曲房榮而窈
眇兮長廊邈而蕭條於是迴路逶夷邃宇玄芒深堂百
室曾臺千房闢南牕而蒙暑兮啓朔牖而履霜遊陽堂
而久溫兮步陰房而夏涼萬禽委蛇於潛室兮驚風矯

翼而來翔紛譎譎於有象兮邈悠忽而無方于時南征
司火朱明鬱遂縣車式徐曜靈西墜暑乘陰而增炎兮
景望淵而曖昧玩瓊宇而情歎兮覽八方而思銳陋雨
館之常規兮鄙鳴鶴之蔽蒂仰凌眄於天庭兮俛旁觀
乎萬類北溟浩以揚波兮青林煥其興蔚扶桑細於毫
末兮崑崙卑乎覆篲於是忽焉俛仰天地既翕宇宙
同區萬物為一原千變之常鈞兮齊億載於今日彼區
中之側陋兮非吾黨之一室本達觀於無形兮今何求

而有質於是聊樂近遊薄言儂佯朝登金虎夕步文昌
綺疏列於東序朱戶立乎西廂經蕤滋以披藻兮椒塗
馥而遺芳感舊物之咸存兮悲昔人之云亡憑虛檻而
遠想兮審歷命於斯堂於是精疲遊倦白日藏輝鄙春
登之有情兮惡荆臺之忘歸聊弭節而駕言兮悵將逝
而徘徊感崇替之靡常兮悟廢興而永懷隆期啓而雲
升逝運靡其如頽長發惟祥天鑒在晉肅有命而龍飛
兮冊重斯而肇建嘉有魏之欽若兮鑒靈符而告禪清

文昌之離宮兮虛紫微而為獻委普天之光宅兮質率
土之黎彥欽哉皇之承天兮集北顧於乃眷誕洪祚之遠
期兮則斯年於有萬

南征賦

并序

太安二年秋八月奸臣羊玄之皇甫商敢行稱亂凌逼
乘輿天子蒙塵于外自秋徂冬大將軍敷命群后同恤
社稷乃身統三軍以謀國難自義聲所及四海之內朔
漠之表蒸徒羸糧而請奮胡馬欵塞而思征四方之會

衆以百萬軍旅之盛威靈之著自古已來未之有也粵
十月軍次于朝歌講武治戎以觀兵于殷墟於是美義
征之舉壯師徒之盛乃作南征賦以揚匡霸之勲云爾
有皇晉之霸后資濬哲之睿聖崇文德於緝熙濟武功
而保定應天鑒之昭華荷帝祐之休命步玉衡以觀八
方在璇璣而齊七政芒芒神道化洽崇深仰戾天飛俯
洞淵沈振南箕以鼓物冒慶雲而崇蔭恢天維以籠世
廓宇宙而宅心濟博施之厚德鏗希聲之大音淵澤回

而竝注豪彥萃而為林九服惟清諸夏謐靜肅慎回首
沙漠引領天和時降地靈夙挺結芳林之竒幹發珍禾
之神穎勵修德於億兆澄形於萬景在中葉之不競
遭皇家之毒亂悲國步之未夷仰夙興而昧旦括無方
而大誥集率土而貞觀致天屬於王畿肅宵征而省難
爾乃建黃鉞之靈威樹戎輅之高蓋伐隱天之雷鼓振
凌霄之電旆介夫揮戈而夙興輕武總干而啓萬振靈
韶之嘈嘈飛旗旒之藹藹虹旃沂風以委蛇霓旄蒙光

而容裔公徒十萬其會雲興悠悠華戎時固丕承爾乃
命屏翳以夕降式飛廉以朝升塗蒙雨而復清景帶天
而光澄陪武臣於彫軒列名僚於後乘猛將起而虎嘯
商飈肅其來應士憑威而嚮駭馬獻天而景凌臨川屯
於廣陸武騎被乎中陵類馮比京師徒經始桓桓先征
在河之涘順彼長道懸旌千里羨王師之尊時茂七德
而發止爾乃稅駕殷墟我徒既閑順時講武薄狩于原
紛同方而類聚煥副翼而明分祗明刑以誓衆習軍政

於舊聞儼山立以崇蒼粲煙駭而興紛若冥海之引回流岱靈之吐行雲于時玄冬首時陰風戒殺山澤含哀天地肅又閒夜列以澄清中原曠而曖昧戎士肅而成戒三軍紛而雜還長角哀叫以命旅金鼓隱訇而啓伐景陵冥而四播音乘雲而上逝火烈具舉伐鼓淵淵朱光俯而丹野炎暉仰而絳天曜靈翕赫以增熾憤氣睇悅以凌煙狂飈起而妄駭行雲藹而芊眠旌旆翻其猗靡驚燦因而嬗娟爾乃洪音雷動清聞尅廣凌雲發揮

萬里振響聲馮虛而天回烈駭空而地蕩映皓月而望舒
閭照重昏而大夜朗服縣炎揚而晁儵飛烽戢煜而決
漉乃有熊羆之旅虓闕之將雄聲泉涌逸氣風亮超三
軍以奔厲賈餘勇而成壯兆洪音於寂漠先無形而高
唱紛若屯雲渙若積波遁陰匿景靜言勿譁絕倡寂其
既收萬夫翕而咸和嚴鼓隱而重戒景燧盪而星羅烈
蒙陰而仰假曜憑陽而登遐若扶桑之振華葉皓天之
散朝霞超燭龍之絕景豈比象於百華

寒蟬賦 并序

昔人稱雞有五德而作者賦焉至於寒蟬才齊其美獨未之思而莫斯述夫頭上有綏則其文也含氣飲露則其清也黍稷不食則其廉也處不巢居則其儉也應候守節則其信也加以冠冕則其容也君子則其操可以事君可以立身豈非至德之蟲哉且攀木寒鳴負才所歎余昔僑處切有感焉興賦云爾

伊寒蟬之感運近嘉時以遊征含二儀之和氣稟乾元

之清靈體真精之淑質吐崢嶸之哀聲希慶雲以優遊
遁太陰以自寧於是靈岳幽峻長林參差爰蟬集止輕
羽莎佗清澈微激德音孔嘉承南風以軒景附高松之
上華黍稷惟馨而匪享竦身晞陽乎靈和唳乎其音翩
乎其翔容麗蜩螗聲美宮商飄如飛焱之遺驚風眇如
輕雲之麗太陽華靈鳳之羽儀睹皇都乎上京跨天路
於萬里豈蒼蠅之尋常爾乃振修綏以表首舒輕翅而
迅翰挹朝華之墜露含烟温以夕飡望北林以鷺飛集膠木

以龍蟠彰淵信於巖時稟清誠乎自然翩眇微妙綿蠻
其形翔林附木一枝不盈豈黃鳥之敢希唯鴻毛其猶
輕憑綠葉之餘光景秋華之方零思鳳居以翹竦仰竚
立而哀鳴若夫歲聿云暮上天其涼感運悲聲貧士含
傷或歌我行永久或詠之子無裳原思嘆於蓬室孤竹
吟於首陽不銜子以穢身不勤身以營巢志高於鳴鳩
節妙乎鳴鵲附枯枝以永處倚瓊林之迴條惟雨雪之
霏霏哀北風之飄飄既乃彫以金采圖我嘉容珍景曜

爛暉華豐竒侔黼黻艷比袞龍清和明潔群動希蹤
爾乃綴以玄冕增成首飾纓旌翩紛九蟲容翼映華旒
於朱袞表馨香乎明德於是公侯常伯乃紆紫黻執龍
淵俯鳴珮玉仰撫貂蟬飾黃廬之多士光帝皇之待人
既騰儀像於雲闈望景曜乎通天邁休聲之五德豈鳴
鷄之獨珍聊振思於翰藻闈令問以長存於是貧居之
士喟爾相與而俱嘆曰寒蟬哀鳴其聲也悲四時云暮
臨河徘徊感北門之憂殷嘆卒歲之無衣望泰清之巍

命
卷一
我思希光而無階簡嘉蹤於皇心冠神景乎紫微詠清
風以慷慨發哀歌以慰懷

陸士龍集卷一

欽定四庫全書

陸士龍集卷二

晉陸雲撰

詩

四言失題

前八章
後六章

悠悠縣象昭回太素清濁迭興升降啓度遺和既爽季
春告暮朱明來思青陽受煦

其二

日征月盈天道變通太初陶物造化為功四月惟夏南
征觀方凱風有集飄飄南窓思樂萬物觀異知同

其三

有滄萋萋甘雨未播黍稷方華中田多稼庭槐振藻園
桃阿那薄言觀物在堂知化

其四

蓬戶惟清玩物一室明發有懷念昔先哲通夢幽人彷彿
遺烈清暉在天孰與永日

其五

乃啓遺籍思予大觀幽居傲物顧景怡顏況惟解舞衡
門重關思媚古人有懷良盤沈曦含暉芳烈如蘭

其六

厥初生民有物有類自古有稱大寶以位征徒式好俊
奔攸遂啓予有聞誨爾達貴

其七

達貴伊何天爵無榮渾淪大昧混其濁清毀方遁象遺

頑履貞道實藏器景以昭形

其八

芒芒陋世奚競奚錯牧彼紛華委之沖漠漂志垂天矯
心馮閣通好莊聃儀形有作安得達人顧予命薄

其一

後六章

思樂芳林言采其菊衡薄遵塗中原有菽登彼修巒在
林寤宿彷彿佳人清顏如玉

其二

予美亡此誰為適道容與俟之玄髮方皓躑躅山阿玩
此芳草願餐其穎庶以遺老

其三

亶亶嘉時飄忽棄予有膽逝深永嘆潛許登願扶桑仰
結飛晷伊人匪存遺芳孰與

其四

精氣為物或降或升徂落攸往神奇有登死生為徒存
亡曷勝謂予不信遺籍有徵

其五

閒居外物靜言樂幽繩樞增結甕牖綢繆和神當春清
節為秋天地則爾戶庭已悠

其六

嗟我懷人悠悠其潛念昔先烈有懷所欽駭情玩世堂
允南金瓊輝邈矣誰適為心明發興言慷慨芳林

征西大將軍京陵王公會射堂皇太子見命作

此詩

芒芒太極玄化烟煴頽形成器凌象垂文大鈞造物庶
類群分先識經始實綜彞倫

其二

惟岳隆周生甫及申天監在晉祚之降神邈矣遐風茂
德有隣永言配命惟晉之鎮

其三

厥鎮伊何實幹心膂文教內輔武功外禦淮方未靖帝
曰攸序公于出征奄有南浦

其四

南海既賓爰戢干戈
桃林釋駕天馬婆娑
象齒南金來格皇家
絕音協徽宇宙告和

其五

玄綱峻極天罔既絃
文武方升允茲兼弘
莪莪高夏有肅其涼
公侯戾止駉驥龍驤
善問如林在會鏘鏘

其六

祝融御節火正緝熙
凱風徘徊萬物欣時
秩秩初筵薄

言在茲嘉福介祐萬壽無期

大將軍宴會被命作此詩

皇皇帝祐誕隆駿命四祖正家天祿保定叡哲惟晉世
有明聖如彼日月萬景攸正

其二

巍巍明聖道隆自天則明分爽觀象洞玄凌風叶紀絕
輝照淵肅雍往播福祿來臻

其三

在晉奸臣稱亂紫微神風潛駭有赫茲威靈旗樹旆如
電斯揮致天之屈于河之沂有命再集皇輿凱歸

其四

顏網既振品物咸秩神道見素遺華反質辰晷重光協
風應律函夏無塵海外有謚

其五

芒芒宇宙天地交泰王在華堂式宴嘉會玄輝峻朗翠
雲崇藹冕弁振纓藻服垂帶

其六

祁祁臣僚有來雍雍薄言載考承顏下風俯覲嘉客仰
瞻玉容施已唯約于禮斯豐天錫難老如岳之崇

太尉王公以九錫命大將軍讓公將還京邑祖
餞贈此詩

烈文辟公時惟哲王闡縱絕期乎顯幽光內實慎徽緝
熙有臧出紉方慝間督不揚高山峻極天造芒芒

其二

天子念功大典光備肅肅王命宰臣蒞事穆矣淵讓遺
功遂志思我遠猷德音孰嗣

其三

后命既靈王人反旆興言出祖飲餞于邁旌旆泱泱
軒藹藹和風弭塵清暉映蓋

其四

思樂中陵言觀其川公王戾止有車鞶鞶伊誰云饗我
有嘉賓羽觴舉酬酢爾征人

其五

悠悠征人四牡駢駢發軫北京振策紫微昔乃云來春
林方輝歲亦暮止之子言歸道塗興戀伏載稱薇

其六

聖澤既渥嘉會惜惜庭旅鐘鼓堂有瑟瑟飛轡清暉扶
桑移蔭視景祇慕揮袂沾襟變彼同栖悲爾異林我有
旨酒以歌以吟

大安二年夏四月大將軍出祖王羊二公於城

南堂皇被命作此詩

時文唯晉天祚有祥聖宰作弼受言既臧有赫斯庸勲
格昊蒼景物台暉棟隆玉堂

其二

惟常思庸大興光迪聖敬遠濟神道玄邈思媚三靈誕
膺天篤嘉命既辱王人言告

其三

翼翼王人言告惟慕公輿駕言乃眷斯顧華旂飛藻鳴

鸞振路駢駢駟牡噓天載步

其四

我有高夏如雲斯蒼彫軒戾止薄言嘉會問誰在宴惟
俊惟又豐俎殷薦獻酬交泰

其五

悠悠昊天南正興言朱明有暉萬葉翠繁昌雲垂天凱
風熙顏王臣在此貽宴于懽

其六

懸象西頽虞淵納景嘉樂未晞嚴駕已整行矣征人身
垂路永飛驂顧懷華蟬引領遺思北京結轡臺省

贈顧驃騎

有皇美祁陽也祁陽秉文之士駿發其聲故能明照有
吳入顯乎晉國人美之故作是詩焉

有皇大晉時文憲章規天有光矩地無疆神篤斯祐本
顯克昌載生之雋實惟祁陽哲問宣猷考茂其相

其二

於鑠祁陽誕鍾天篤清暉龍見玄猷淵嘿沈機響駭幽
神廣覲和以同人歸物時育有大惡盈謙以自牧思我
懿範萬民來服

其三

吳未喪師天秩有庸淵哉若人弱冠休風俯翼黃門以
德來忠端秀蕃后正色儲宮徽音鑠穎邈矣遐蹤

其四

皇惟南終舊邦匪歆委弁釋位如龍之潛考槃窮谷假

樂豐林子雖藏器鐘鼓有音惠風往敬慶問來尋

其五

濟濟元公相惟天子明明辟王思隆多士帝曰欽哉有
命集止我咨四方令問在爾以朕大賚乃膺嘉祉聿來
胥步觀國之紀

其六

惟皇建極緝熙清曜我有後民明德來照大觀在上王
假有廟顯允顧生金聲玉振之子于升利見大人龍輝

絕跡有肅清塵

其七

清塵既彰朝虛好爵敬子侯度慎徽百辟予聞有命得
禮不易嗟我懷人瞻言永錫豐祐東法惟子之績

其八

遵汶涉泗言告同征勁風宵烈湛露朝零雲垂藹下泉
冽清泠哀哉行人感物傷情從子京邑言觀厥成天保
祚德式穀以寧

思文美祁陽也祁陽能明其德刑于寡妻以至于家邦無思不服亦賴賢妃貞女以成其內教故作是詩焉

思文祁陽祁陽克峻天錫純嘏宣茲義問德音既烈海外有奮既奮斯音祇敬厥德昭治其家覃及邦國永肇儀刑俾民惟則

其二

文王在上太姒思齊魯侯克昌亦賴令妻鑒神有顧頻繁在斯祁陽載天作之伉儷

其三

在虞之胄實惟有姚穎艷玉秀華茂桃夭居顯祇明在
靈格幽清塵熠爍淑心綢繆爰及祁陽惟德之周

其四

其德伊何和貞虔告師氏履素言謀慮度鐘鼓思樂靖
端夙效考休攸嬪來嫁于顧

其五

羔羊執贄玉帛有輝百兩集止之子于歸宗姻風從娣

姪雲回祁陽顧之煥其盈闈

其六

既曰歸止式揚好音言觀河洲有集于林思樂葛藟薄
采其蕈疲彼攸遂乃孚惠心

其七

惠心既孚有恪中饋敦此衆斯永錫嗣類載延窈窕用
和寤寐神之聽之胤祚來爾

其八

昔周之隆有任有姒內刑聖教外崇多士今我淑人實
亮君子疊疊翼翼亦繼斯祉宜爾子孫福祿盈止

從事中郎張彥明為中護軍

思文有聖叡哲配天功濟生黎道合上玄休命發揮有
集惟賢哲彼寤宿澄此在淵

其二

濟濟多士實播令聞王曰欽哉余嘉乃勲徽音孔碩惠
爾風雲穆此芳烈肇揚清芬

其三

肅肅庶僚袷服寵暉肇彼桃虫假翼翻飛出撫邦家人
翔紫微有命既集願言永違

其四

思樂華堂雲構崇基王公有酒薄言饗之景曜徽芒芳
風詠時宴爾賓儉具樂于茲

其五

豐豐我王豐思允臧我客戾止飲酒公堂自彼下僚聿

來有光悲矣永言指塗逝將形違殿闈景附華房

其六

開國承家勿用小人今我聖宰實蕃斯仁凌淵龍躍披
林鳳振正直既好嘉禮式陳振我遠德歸于時民

贈汲郡太守

有序

奚世都為汲郡太守客將之官大將軍崇賢之德既遠
而厚下之恩又隆非此離析有感聖皇既蒙引見又宴
于後園感鹿鳴之宴樂詠魚藻之凱歌而作是詩

於穆皇晉豪彥實蕃天網振維有聖貞觀鳴鳥在林良
駿即開華彼俊乂時亮庶官

其二

抑抑奚生天篤其淳芳穎蘭揮瓊光玉振沈機照物妙
思考神思我善問觀德古人

其三

善問伊何惠音孔韶聲允衡門翻飛宰朝肅雍芳林芬
響凌霄穆矣和風育爾清休

其四

亦既有試出宰邦家之子于行民固謳歌風澄俗儉化
靜世波芒芒既庶且樂于和

其五

我有好爵既成爾服入贊崇華遂登帷幄時文聖宰天
祚方穀朔風徽止鴻漸雲嶽

其六

悠悠斯民三代直道我求明德惟奚攸考緝熙暉章天

祿來保惠心無競豐化有造

其七

樂只君子茂德攸綏嗟我懷人式是言歸聿言來集如
翼斯揮日子不惠照爾清暉

其八

職思既殊亦各有司念我同僚悲爾異事之子之遠悠
悠我思雖無贈之歌以言志

陸士龍集卷二

欽定四庫全書

集部

陸士龍集卷三

詳校官監察御史_臣曹錫寶

檢討_臣何思鈞覆勘

覆校官編修_臣莊通敏

校對官中書_臣李荃

謄錄監生_臣王焜

欽定四庫全書

陸士龍集卷三

晉 陸雲 撰

詩

答兄平原

伊我世族太極降精昔在上代軒虞篤生厥生伊何流
祚萬齡南嶽有神乃降厥靈誕鍾祖考徹茲神明運步
玉衡仰和太清賓御四門旁穆紫庭紫庭既穆威聲爰

振厥振伊何播化殊鄰清風攸被率土歸仁彤弧所轡
萬里無塵功昭王府帝庸厥勲黃鉞授征錫命頻繁闕
如虢虎肅茲三軍光若辰跼亮彼公門仍世上司芳流
慶純雲和所產爰育二昆誕豐岐嶷夙邁令聞今聞伊
何休音允臧先公克構乃崇斯堂耀穎上京發跡扶桑
戎車山征時惟鷹揚鷹揚既昭勲庸克邁天子命我鎮
弼于外在作扞城以表南裔降灾匪蠲景命顛沛惟我
賢昆天姿秀生含竒播珠明德惟馨太陽散氣乃稟厥

和山川垂度爰則厥遐厥遐伊何惟光惟大惟大伊何
如岱如渭恢此廣淵廓彼弘懿洪道惇德淵哉為器統
我先基弱冠慷慨將弘祖業實崇奕世咨予頑蒙叢爾
弱才沈耀玄渚挹庇雲洪陶化靡移固陋于茲瞻仰洪
範實忝先基巍巍先基重規累構赫赫重光遐風激鷲
昔我先公爰造斯猷今我六蔽匪崇克扶悠悠大道載
邈載遐洋洋淵源如海如河昔我先公斯綱斯紀今我
未嗣乃傾乃圮世業之頽自予小子仰愧靈丘銜憂沒

齒憂懷惟何顧景惟塵我我高蹤眇眇賀辰明德繼體
莫非哲人今我頑鄙規範靡遵仍世載德荒之予身莫
峻匪岳有峻斯登莫高匪雲有高斯凌矧我成基匪克
階升玄黃長坂載寐載興豈敢憚行哀此負乘芒芒高
山自予頽之濟濟德義匪予懷之終銜永負于其媿而
昔予言曠汜舟東川銜憂告辭揮淚海濱羲陽趣駕炎
華電征自我不見邈哉八齡悠思迴望寤言通靈昔我
往矣辰在東嵎今我于茲日薄桑榆銜艱邁愍困瘁殷

憂哀矣我世匪蒙靈休開元迄茲震興迭微弱風隱駭
海水羣飛王旅南征闡輝靈威予昆乃播爰集朔土載
離永久其毒太苦上帝休命駕言其歸多我邁愆振蕩
朔垂羈繫殊俗初願用違巖駕東征肅邁林野夕秣乘
馬朝整僕旅矯矯乘馬載驅載馳漫漫長路或降或階
晨風夙零朝不皇飢傾景儵墜夕不存罷雖有豐草匪
釋奔駟雖有重陰匪違假寐煢煢僕夫悠悠遠征經彼
喬木有鳥嚶鳴微物識儕矧伊有情樂茲棠棣實歡友

生既至既覲滯思曠年曠年殊域覲未決辰恨其永懷
憂心孔艱天地永久命也難長生民忽霍昌云其常我
之既存靡績靡紀乾坤難並寂焉其已生若電激沒若
川征存愧松柏逝慚生靈匪去性命實悼徒生苟克析
薪豈憚冥冥瞻企皇極徼福上天冀我友生要期永年
昔我先公邦國攸興今我家道綿綿莫承昔我昆弟如
鸞如龍今我友生凋俊壁雄家哲永徂世業長終華堂
傾構廣宅頽墉高門降衡修庭樹蓬感物悲懷愴矣其

傷惇仁汎愛錫予好音晞光懷寶煥若南金披華玩藻
華若翰林詠彼清聲被之瑟琴味此殊響慰之予心弘
懿忘鄙命之反覆敢投桃李以報珠玉冀憑光益編諸
末錄

兄贈并序

余弱年夙孤與弟士龍銜恤喪庭續會逼王命墨經
即戎時並縈髮悼心告別漸歷八載家邦顛覆凡厥
同生彫落殆半收迹之日感物興哀而龍又先在四

時追當祖載二昆不容道遙銜痛東徂遺情西暮故
作是詩以寄其哀苦焉

於穆予宗稟精東嶽誕育祖考造我南國南國克靖
實繇洪績惟帝念功載繁其錫其錫惟何玄冕衮衣
金石假樂旒鉞授威匪威是信稱平遠德奕世台衡
扶帝紫極

其二

篤生三昆克明克俊遵塗結轍承風襲問帝曰欽哉

纂戎列祚雙組式帶綬章載路即命荆楚對揚休顧
肇敏厥績武功聿舉煙煜芳素綢繆江澣昊天不弔
胡寧棄予

其三

嗟子人斯胡德之微闕彼遺軌則此頑違王事匪監
旂旆屢振委籍舊戈統厥征人祈祈征人載庸載閑
駉駉戎馬有闕有翰昔子翼考惟斯伊撫今子小子
繆尋末緒

其四

有命自天崇替靡常王師乘運席卷江湘雖闕守

守從武臣守局下列譬彼飛塵洪波雷擊與衆同汎
顛跋西夏收跡舊京俯慙堂構仰夢先靈孰云忍媿
寄之我情

其五

伊我俊弟咨爾士龍懷襲瑰瑋播殖清風非德莫懃
非道莫弘垂翼東畿耀穎名邦綿綿洪統非爾孰崇

依依同生恩篤情結義存並濟胡樂之悅願爾偕老
攜手黃髮

其六

昔我西征扼腕川湄掩涕卽路耀袂長辭六龍促節
逝不我待自往迄茲曠年八祀悠悠我思非爾焉在
昔並垂髮今也將老銜哀如感契濶充飽嗟我人斯
胡恤之早

其七

天步多艱性命難誓常懼隕斃孤魂殊裔存不阜物
沒不增壤生若朝風死猶絕景視彼浮遊方之僑客
眷此黃蘆譬之斃宅匪身是去亮會伊惜其惜伊何
言紆其思其思伊何悲彼曠載

其八

出車戒塗言告言歸蓐食驚駕夙興宵馳濛雨之陰
炤月之輝陸陵峻坂川越洪漪爰屆爰止步彼高堂
失爾羽邁良願中荒我心永懷匪悅匪康

其九

昔我斯逝兄弟孔仁今我來思或彫或疲昔我斯逝
族有餘榮今我來思堂有哀聲我行其道鞠為茂草
我履其房物存人亡拊膺涕泣血淚彷徨

其十

企佇朔路言送爾歸心存言宴日想容輝迫彼窀穸
載驅東路繼其桑梓肆力丘墓婉兮孌兮興懷罔極
眷言顧之使我心惻

贈鄭曼季往返八首

谷風懷思也君子在野愛而不見故作是詩言其懷思之也

習習谷風扇此暮春玄澤墜潤靈爽烟煴高山熾景喬木興繁蘭波清踴芳澣增涼感物興想念我懷人

其二

習習谷風載穆其音流瑩鼓物清塵拂霖雨嘉播有渰淒陰歸鴻逝矣玄鳥來吟嗟我懷人其居樂潛明發

有想如結予心

其三

習習谷風以溫以涼玄黃交泰品物含章潛介淵躍候
鳥雲翔嗟我懷人在津之梁明發有思凌波褰裳

其四

習習谷風其集惟高嗟我懷人於焉道遥鸞栖高岡耳
想雲韶拊翼墜夕和鳴興朝我之思之言懷其休

其五

習習谷風其音孔嘉所謂伊人在谷之阿虎質山嘯龍
輝淵燭維南有箕匪休其和有採斯畢俾爾滂沱懿厥
河漢惟彼太華明發有懷我勞如何

鄭荅

鴛鴦美賢也有賢者二人雙飛東岳揚輝上京其兄
已顯登得朝而弟中漸婆娑衡門然其勞謙接士吐
握待賢雖姬公之下白屋洙泗之養三千無以過也
乃肯垂顧惠我好音思樂結永好之懽云爾

鴛鴦于飛在江之浚和音反暢拊翼雙起朝遊蘭池
夕宿蘭沚清風翕習扇彼蘭茝凌雲高厲載翔載止

其二

鴛鴦于飛載飛載吟有鬱浚藪實惟桂林芳條高茂
華繁垂陰爰翔爰翔爰憩其南有馥清芬協我好音

其三

鴛鴦于飛乘雲高翔有嚶其友戢翼未翔澹淡素波
容與趨倡雖曰戢止和音遠揚我有好爵與子偕嘗

其四

鴛鴦于飛徘徊翩翩載頡載頽命侶鳴群有鬱蘭皋
冽彼清源駕言遊之聊樂我云思與佳人齊懽順川

其五

鴛鴦于飛或飛或遊習習谷風扇彼清流春草揚翹
龜龜沉浮感物興想我心長憂誰謂河廣曾不容舟
企予望之搔首踟躕

其六

鴛鴦于飛載和其鳴懷爾好音寡我中情人亦有言
心得遺形授我木瓜報爾瑤瓊匪繫日報永好千齡

陸贈

鳴鶴美君子也太平之世君子猶有退而窮居者樂天
知命無憂無欲念碩人之考槃傷有德之遺世故作是
詩也

鳴鶴在陰戢其左翼肅雍和鳴在川之側假樂君子祚
爾明德思樂重虛歸于其極嗟我懷人惟馨黍稷

其二

鳴鶴在陰其鳴喈喈垂翼蘭沼濯清芳池假樂君子其
茂猗猗底之瑰寶有粲瓊瓌乃振袿裳襲爾好衣嗟我
懷人啓襟以晞

其三

鳴鶴在陰其儀藹藹謂天蓋高和音于邁假樂君子篤
膺俊乂穆風潛烈興雲戢蒼德茂當年時衍嘉會安得
攀藻改爾縞帶嗟我懷人心焉忼慨

其四

鳴鶴在陰載好其聲漸陸儀羽遵渚回涇假樂君子祚
之篤生德耀有穆如瑤如瓊安得風帆深濯鬣滅景遺
雲雨爾在北冥嗟我懷人惟用傷情

鄭答

蘭林懽至好也有君子世濟其美英名光茂遭時暫
否福德衡門顧我慙懃屢辱德音思與結好以永不
刊

瞻彼蘭林有翹有秀有斐君子邦之碩茂厥德伊何
固天攸授如川之源如山之富回流清淵啓襟開裕縉
紳晞風民用胥附

其二

猗猗碩人如玉如金浚其明哲尅廣德心習習凱風
吹我棘林飛鴉萃至允懷好音悠悠征徒輔德鮮任
嗟我猗人和樂實忱

其三

在昔延州鵠鳴江涯今我陸子曠世繼竒身垂千載
德音並馳漸鴻遵渚究其羽儀安得高風騰翮天池

其四

飛龍蜿蜒山谷升氣猛虎嘯吟清風高厲情同來感
數垂身逝夷鮑齊懽專名故世愷悌君子民之攸墜
咨予遘時千載同愛

其五

垂隴之會匪詩不宣嗟我懷人斯恩斯勤德音來訊

有蔚其文菽菽兔兔匪迹不存誠在心德愛結忘言

陸贈

南衡美君子也言君子避世不悶以德存身作者思其
以德來仕又願言就之宿感白駒之義而作是詩焉
南衡惟岳峻極昊蒼瞻彼江湘惟水泱泱清和有合後
又以臧天保定爾茂以瓊光景秀濛汜穎逸扶桑我之
懷矣休音峻揚

其二

穆穆休音有來爾雍沈波涌與淵芳馥風僚虛養恬照
日遺蹤考槃導渚思樂潛龍我之懷矣寘爾華宮

其三

和璧在山荆林玉潤之子于潛清輝遠振克稱輔德作
寶有晉和聲在林羽儀未變我之懷矣有客來信

其四

風雲有作應通山淵清琴啓彈宮商乘弦類族知感有
命自天夷叔希世猶謂比肩矧我與子姤會斯年

其五

我之懷矣在彼北林北林何有於煥斯文瓊瑰非寶尺
牘成珍豐華非妙得意惟神河魴登俎遺答清川

鄭答

南山酬至德也有退仕衡門修道以養和棄物以存
神民思其治士懷其德或思置之列位或思從之信
宿詩人嘉與此賢常年相遇又屢獲德音情懼心至
故作是詩焉

陟彼南山言采其蕭樂只君子邦家之翹克茂厥猶
輶德是收聊道以儉廣愛以周嗟我懷人永好千秋

其二

瞻彼江潭言釣其鱖有美碩人自公退處羔裘逍遙
輶德是舉白駒遯時世事孰與思我猗人置之晉序
有客信信獨寐寤語

其三

天高地卑玄黃烟煜人道交泰自昔先民耽文好合

卷三
輔德與仁管叔罕僑曠世難鄰修組施結立并生塵
咨我與子邁會當身琴瑟在御永愛纏綿

其四

瞻彼江澳言詠其潭所謂伊人在水之陰養和以泰
樂道之潛錦衣尚絅至樂是耽興言永思繫懷所欽
愛而不見獨寐寤吟

其五

詩以言志先民是經乃惠嘉訊德音惟馨欽詠繁藻

永結中情華文傷實世士所營達人神化反之混冥
交棄其數言取其誠思與哲人獨寶其貞

陸贈

瞻彼高崗有猗其桐允也君子實寶南江員規啓俗沈
矩履方泳此明流清澗川通陟彼衡林味其回芳

其二

馥馥回芳綢繆中原祁祁庶類薄采其芬栖遲泌丘容
與衡門聲播東汜響溢南雲

其三

穆穆閭闔南端啓籥庶明以庸帝聽式闕有鳳于潛在
林栖翮非予之祚孰與好爵

其四

幽居玩物顧景自頤發憤潛惟仞拂有思子美忘此終
然昏來企予與言惟用作詩

鄭答

瞻彼中林蘭英猗猗允矣君子樂且有儀沈仁育物

玄聰鏡機德充聞庭名逸南畿祁祁俊友言酌言依

其二

鼓鐘于宮百里震聲疊疊令問歸我偉貞厥震伊何
駿奔以驚厥問伊何民昏以寧有鶴在陰非子誰鳴
我有好爵非子孰盈

其三

潛龍遁初有鳳戢翬王猶未泰彝倫錯違臯門重重
資爾啓扉庶績適敷非爾焉綏翼翼京宇俟爾攸晞

民之胥望如渴如饑

其四

德音來惠覆玩三周沈潤淵洞逸藻雲浮結心所親
曷變曷渝路隔津梁一葦限殊終朝之思三秋是踰
愛而不見興言踟蹰

贈顧尚書

五嶽降神四瀆炳靈兩儀鈞陶參和大成兆光人倫誕
育至英於顯尚書實惟我兄行成世則才為時生體道

既弘大德允明厥弘伊何靡曠不遵厥明伊何靡妙不
研無索炤灼有求幽玄細微不錯毫芒以陳積篲為山
納流成淵扶翹布華養物作春所肅以禮所潤以仁宣
質拔行耀文入采堅不可錯清如凝水方迹迎服蹈齊
闕里睇聖而惟亦顧之子彼棄芝英玩此蘭茝異世同
芳其馥不已我蘭既馥我風載清能芬南岳運芳北征
子有其德人求其馨逝此陋巷薰彼紫庭厥音不已鼓
鐘有聲聞天之聰譬之鵠鳴天聰既昭我實惟彰乘風

之鳳眷言朝陽披雲藻繡來此舊鄉謙光自抑厥輝愈
揚麗容雕翕孔好已張既照平林具我華英華英已曜
餘光難延會淺別速哀以紹欣追曠同塗暫和笑言殊
音合奏曲異響連絕我惟條統我思因根分來在愛感
往思我非形景有處有遊載離載會且懼且憂感彼遠
曠宏此延娛樂奏聲哀言發涕流唯願我子德與福俱
亦天之祐亦我之私

贈顧彥先

玄黃挺秀誕受至真行該其高德備其新光瑩之偉隋
卞同珍騰都之足龍鳳合塵

其二

皇皇明哲應期繼聲華映殊域實鎮天庭入輔出輔乾
乾靡寧夏發涼臺我雨我暑冬違邦族風霜是處嗟彼
獨宿誰與晤語飄飄艱辛非禹孰舉言念君子悵惟心
楚

其三

蘇東坡詩集卷三
卷三
悠悠山川駢駢征遐陟升嶠堯降涉洪波言無不利乘
嶮而嘉人懷思慮我保其和

其四

邂逅相遇良願乃從不逢知己誰濟子躬莫攀莫附媿
我高風時過年邁晷冉桑榆晞光賴潤亦在斯須假我
夷塗頓不忘驅汜子津川桴不失浮無愛餘暉遂暗東
隅

其五

幽幽東嶠戀彼西歸瞻儀情感聆音心悲之子于邁夙
夜京畿王事多難仲焉徘徊

答顧秀才

茫茫上玄有物有則厥初造命立我藝則爰茲族類有
覺先識斯文未喪誕育明德

其二

允矣顧生載靈之和沈根芳沼濯秀蘭波淵翹載穎景
茂凌華惟是德心是用閑邪

其三

德心伊何行歸于周希高仰峻企遠懷悠匪願在明靡
倦斯幽凡我同朋瞻言清休

其四

慎終于遠俾民歸厚言若有行及予攜手何以恤我其
仁孔有心之云愛隆敬其久

其五

既邁斯仁亦迪茲文藻不雕樸華不變淳有斐君子如

珪如璠仰欽德類依懷惠詮式揚好問邦家于宣

答大將軍祭酒顧令文

惟林有鸞惟淵有螭顯允明德實邦之基先后陟恪子
配于茲遵彼玉堂受言邁之

其二

中原有軌世鮮克蹈先民有懷子探其妙心猶水鑒函
景內照名若振炎攄光外耀

其三

相彼水鑒民胥攸臨矧曰明德人誰弗欽寫我朶頤即
爾澄心義隆自古好邈在今

其四

大人有作興雲自天之子于升亦躍于淵景曳清霄響
發鳴弦義問弘集淑風載鮮

其五

企子朔都非子孰念豈無弱翰才不克瞻惠音聿來瓊
華玉艷無德不報念辭惟忝

答吳王上將顧處徵

邈矣大昧造化明明物以曲全人以直生類聚百族群
分萬形負淵挺隋方川吐瓊

其二

藹藹洪族天祿攸蕃神綏厥本道裕其源條有豐葉波
無輟瀾烈風時播芳響世繁

其三

曰繁曰頤載德于茲克文克敏乃惠乃慈遵彼洪流薄

言詠之好是神契聊與之期

其四

仁勇同宅文武相紛王謂御事誰撫上軍於時翫飛虎
嘯江瀆式遏不虞俾也無塵

其五

三代既遠直道垂音非齒焉尚非德焉欽鑽仰自古鮮
曰在今匪唯形交殷薦其心

其六

心以殷薦分以道成祇服惠顧疇此深情亦有芳訊薄
載其誠豈無春暉茲焉可榮

其七

大道易聞崇軌難襲孰云匪愆咎去尤集敢謝不佞栖
山自戢臨篇焉愧德輶辭輯

其八

翩彼日月逝猶駭電朝華未厭夕風已扇詩亦有悲無
幾相見懷德歎心于焉東眷

其九

平津晚貢貢公後徵陟彼玉階黃髮來升靈卉三秀芳
草秋興唯願清神福祿是膺

贈鄱陽府君張仲膺

神林何有竒華妙實皇朝如何窮文極質斌斌君子升
堂入室太上有曜子誕其輝知幾日難子達其微入輔
帷幄出御千里滔滔江漢南國之紀

其二

謁帝東堂剖符南征天子命我車服以榮何以潤之德
被蒼生何以濟之威振羣城却愚以化崇賢以仁鳳舒
其翮龍濯其鱗憶彼荒藪莫敢不賓雖云舊邦其命惟
新

其三

卞和南金終始一色顯允君子窮達一德弘仁厲道物
究其極古賢受爵循墻虔恭今哲居貴履盈如沖接新
以化愛舊以豐隆此嚶鳴悖彼谷風

其四

忠至寵加孝至榮集內崇南芬外清名邑煒煒棠棣
增其華猗猗桑梓厥耀孔多被繡畫行昔人攸羨階雲
飛藻孰與同粲

其五

人道伊何難合易離會如升峻別如順淇嗟我懷人曷
云其來貢言執手涕既隕之

答孫顯世

邈矣上祖垂休萬葉廣問弘被崇軌峻躡高山克荒大
川利涉繁藹惟枯風連雲接

其二

大人有作二后利見九功敷奏七德殷薦鼎實重芳勞
烈再扇奕世弘道天祿來宴

其三

道弘振古祚未替今如彼在川亦有浮沈大韶既素饗
非我音豈曰荒止塗弗克尋

其四

昌風改物豐水易瀾百川總紀四海合源在彼焉取聿
來莫觀曾是褊心敢忘丘園

其五

員暉偏照玄澤謬盈發彼承華頓此增城紀景靈雲倦
遊紫庭匪曰能知寔忝長纓

其六

煥矣金虎襲我皇猷孰云匪宏仰媿蒼流往蹇來反弭

迹一丘變彼東朝言即爾謀

其七

振振孫子洪族之紀志擬龍潛德配麟趾引服朗節克
明峻軌遵彼中臯於穆不已

其八

於穆不已大都是階之子于命民膺如隕厚德時邁協
風允諧惠此海湄俾也可懷

其九

乃眷丘林樂哉河曲解紱披褐投印懷玉遺情春臺託
蔭寒木言念伊人溫其在谷

其十

道俟人行辭以義輯和容過表余未云執惠音弘播清
風駿集懷德形懽臨篇景立

孫贈

五龍戢號雲鳥纂紀淳化既離義風肅始軒冕垂容
文教乃理奕奕英族盛德豐祀

其二

於赫皇吳應天統元蒸文烈公光讚懿勲九命重輝
恭德彌勤華黻襲藻金石載振

其三

淵哉陸生本顯洪胄亦崇懿風邈比弘裕無競惟德
豐光伊茂文以義好施以仁富

其四

山積惟峻道隆名遐潛景在淵龍躍承華既升爾儀

誰不允嘉有淮重深載清其波

其五

濟濟皇朝峨峨髦士序爵以賢惟俊萃止翩翩二官
令問不已乃遷華閣皇典斯紀

其六

思文大謨恢我王猷清風肆穆雅憲允休邁彼江川
邈此北流微言蘭馥玉藻雲浮

其七

遭時之險虎宰滔天憑德羨重繫此俊賢休否既亨
名以德淵清微伊鑠鑽之彌堅

其八

明明大象玄鑒照微顯允君子求福不回善挹引慶
險以德祈澄濁以靜罔久不暉

其九

釋彼遊寄樂此窈貞形以神和思以道新清雲方乘
芳餌可捐達觀在一萬物自賓

其十

寂寞重門誰和子音瞻彼晨風思託茂林惟彼吉人
實獲我心薄言贈子仰止高岑

陸士龍集卷三